

## Bylaag C

### Besluit oor Kerkhereniging: NG Kerk Wes- en Suid-Kaap

#### Die Sinode van Wes- en Suid-Kaap

1. Bevestig sy verbintenis aan die kerkherenigingsproses met die VGK en al die ander kerke van die NG Familie asook sy dringende wens dat hierdie hereniging so spoedig as moontlik sal plaasvind.

2. Laat hom in sy besluite oor die kerkherenigingsproses lei deur die volgende oortuigings

- Ons glo dat die hereniging van die familie van die NG Kerke noodsaaklik is omdat die woord van die Here baie duidelik praat oor die belangrikheid van die eenheid van sy kerk. Ons glo dat die liefde wat ons as gelowiges in Christus vir mekaar koester, ons dring tot kerkhereniging.
- Ons glo van harte dat kerkhereniging ons ook gaan help om die roeping wat ons as kerke in Suider-Afrika het, beter te verstaan en uit te leef. Kerkeenheid is nodig ter wille van 'n gesamentlike kyk op die probleme van die land, vir gesamentlike aksie, vir gesamentlike getuienis en uiteindelik vir die geloofwaardigheid van ons werk en getuienis.
- Ons glo dat die proses van kerkhereniging ons ook die geleentheid bied om 'n getuienis te lewer oor die vergewende en vernuwende krag van die evangelie van Christus. Nadat daar vir meer as 200 jaar net een NG Kerk in SA was, het daar in 1881 'n breuk binne die kerk gekom. As die breuk herstel kan word, is dit 'n wonderlike getuienis oor die vernuwende en helende krag van die evangelie.
- Ons is bewus van die feit dat kerkherenigingsprosesse gewoonlik komplekse en delikate prosesse is. Feitlik alle kerke wat deur sulke prosesse gegaan het, getuig daarvan. Dit mag ons egter nie ontmoedig nie, maar moet ons motiveer om die proses met groot liefde, verantwoordelikheid en baie gebed aan te pak.
- Ons is oortuig dat die besluit hieroor nie maar 'n gewone roetinebesluit is nie, maar na ons kom as 'n toets vir ons geloof in die Een Lewende God – die Een Vader wie se kinders ons almal is, die Gekruisigde en Opgestane Christus wat ons in sy Een Liggaam ingelyf het en die Een Lewendmakende Gees wat ons saam in sy diens wil gebruik, tot seën in Afrika.

3. Neem met dank kennis van die Konvent vir Eenheid wat in 2001 gehou is en vereenselwig homself volledig met punte 1 en 2 van die besluit van die Konvent oor die Belydenisgrondslag wat soos volg lui:

“Dat die Konvent vir Eenheid en die drie oudkerklike ekumeniese simbole, die Drie Formuliere van Enigheid en die Belhar Belydenis as basis en riglyn vir sy gesprek oor kerkeenheid neem;

Dat die Konvent aanbeveel dat die Belhar Belydenis ingesluit word in die belydenisgrondslag van 'n groter herenigende kerk op 'n wyse wat die eenwordingsproses dien.”

4. Vra dat die partye betrokke by die Konvent vir Eenheid versoek word om die moontlikheid van stigting van 'n sinode vir die NG Familie in Kaapland te ondersoek in terme van Reglement 6.5 van die Algemene Sinode. Die reglement maak dit moontlik dat vergaderings van verskillende kerke per ooreenkoms saam kan fungeer – soos wat reeds gebeur by die KGA, Badisa en sekere ringe.

5. Besluit dat die Sinode die beskrywingspunt van die Moderamens van die NG Kerk in Wes- en Suid-Kaap en in Oos-Kaapland aan die Algemene Sinode ten opsigte van die belydenisgrondslag en struktuur vir een Kerkverband, [Agenda Algemene Sinode B16.6 po bladsy 443] in 'n gewysigde vorm na die Konvent deursteur as 'n moontlike voorbeeld van hoe bg sake hanteer sou kon word (sien bylae 1).

6. Omdat ons al ons gemeentes op die pad van kerkhereniging wil saamneem, verbind ons ons aan 'n proses van oop gesprek, kommunikasie en raadpleging met ons gemeentes. In hierdie gesprek moet aandag gegee word aan oa die volgende aspekte:

- Ø Die redes waarom die Sinode oordeel dat kerkhereniging 'n noodsaaklike proses is
- Ø die moontlike verloop (in fases) van die kerkherenigingsproses en die implikasies daarvan – ter wille daarvan om misverstande uit die weg te ruim;
- Ø materiaal moet beskikbaar gemaak word wat gemeentes en lidmate kan help om gesamentlike gesprekke te voer oor veral

twee sake, naamlik die roeping van die kerk van Christus in die nuwe situasie in SA en die vraag met watter geloof en belydenis ons die uitdagings tegemoet gaan. Hierin is die herlees en gesamentlike uitleg van die herenigde kerk se belydenisse van groot belang;

Ø Ten opsigte van die Belhar Belydenis word gevra:

- dat informasie oor die ontstaansgeskiedenis en intensies van die Belhar Belydenis beskikbaar gemaak word;
- dat getuienisse uit die VGK asook die NG Kerk oor die wesenlike rol wat die Belhar Belydenis in hul lewens speel ook beskikbaar gestel sal word;
- dat die gesamentlike en eietydse uitleg van die Belhar Belydenis wat deur die Konvent opgestel sal word, so gou as moontlik aan gemeentes beskikbaar gestel word.
- dat die moontlike prosesse en wyse waarvolgens die Belhar Belydenis ingesluit kan word in die belydenisgrondslag verduidelik word.